

# Soek jy 'n fantastiese tutor?

[www.teachme2.com/matriek](http://www.teachme2.com/matriek)





# basic education

Department:  
Basic Education  
**REPUBLIC OF SOUTH AFRICA**

## **SENIORSERTIFIKAAT-EKSAMEN/ NASIONALE SENIORSERTIFIKAAT-EKSAMEN**

**AFRIKAANS HUISTAAL V2**

**2021**

**PUNTE: 80**

**TYD: 2½ uur**

**Hierdie vraestel bestaan uit 30 bladsye.**

## INSTRUKSIES EN INLIGTING

1. Lees die volgende instruksies noukeurig deur voordat jy die vraestel beantwoord.
2. Moenie probeer om die hele vraestel deur te lees nie. Raadpleeg die inhoudsopgawe op bladsy 4 en merk die vraagnommers van die letterkundetekste wat jy bestudeer het. Lees daarna die vrae oor die tekste wat jy gedoen het en kies die soort vraag wat jy wil beantwoord.
3. Die vraestel bestaan uit DRIE afdelings:
 

AFDELING A: Gedigte (30)  
 AFDELING B: Roman (25)  
 AFDELING C: Drama (25)
4. Beantwoord VYF vrae in totaal: DRIE in AFDELING A, EEN in AFDELING B en EEN in AFDELING C.
 

AFDELING A: GEDIGTE  
 Gesiene gedigte – Beantwoord TWEE vrae.  
 Ongesiene gedig – Beantwoord die VERPLIGTE vraag.

AFDELING B: ROMAN  
 Beantwoord EEN vraag.

AFDELING C: DRAMA  
 Beantwoord EEN vraag.
5. KEUSE VAN VRAE BY AFDELING B (ROMAN) EN AFDELING C (DRAMA)
  - Beantwoord SLEGS die vrae oor die roman en drama wat jy bestudeer het.
  - Beantwoord EEN OPSTELVRAAG en EEN KONTEKSTUELE VRAAG. As jy die opstelvraag in AFDELING B beantwoord, moet jy die kontekstuele vraag in AFDELING C beantwoord. As jy die kontekstuele vraag in AFDELING B beantwoord, moet jy die opstelvraag in AFDELING C beantwoord. Gebruik die kontrolelys om jou te help.
6. LENGTE VAN ANTWOORDE
  - Die lengte van die opstel vir die gedig is 250 tot 300 woorde.
  - Die lengte van die opstel vir die roman en drama is 400 tot 450 woorde elk.
  - Die lengte van die antwoorde van die kontekstuele vrae word deur die puntetoekenning van elke vraag bepaal. Beantwoord jou vrae bondig en relevant.
7. Volg die opdragte aan die begin van elke afdeling noukeurig.
8. Nommer die antwoorde korrek volgens die nommeringstelsel wat in hierdie vraestel gebruik is.

9. Beantwoord ELKE afdeling op 'n NUWE bladsy.
10. Voorgestelde tydsindeling:  
  
AFDELING A: ongeveer 40 minute  
AFDELING B: ongeveer 55 minute  
AFDELING C: ongeveer 55 minute
11. Skryf netjies en leesbaar.

**INHOUDSOPGAWE**

<b>AFDELING A: GEDIGTE</b>			
<b>Voorgeskrewe gedigte: Beantwoord ENIGE TWEE vrae.</b>			
<b>VRAAGNOMMER</b>	<b>VRAAG</b>	<b>PUNTE</b>	<b>BLADSY</b>
1. " 'n brief van hulle vakansie"	Opstelvraag	10	6
2. "Reaksie"	Kontekstuele vraag	10	8
3. "Vincent van Gogh"	Kontekstuele vraag	10	9
4. "besoekersboek"	Kontekstuele vraag	10	10
<b>EN</b>			
<b>Ongesiene gedig: Verplichtend</b>			
5. "selfs die son"	Kontekstuele vraag	10	11
<b>AFDELING B: ROMAN</b>			
<b>Beantwoord EEN vraag.*</b>			
6. <i>Die kwart-voor-sewe-lilie</i>	Opstelvraag	25	12
7. <i>Die kwart-voor-sewe-lilie</i>	Kontekstuele vraag	25	12
8. <i>Manaka Plek van die Horings</i>	Opstelvraag	25	15
9. <i>Manaka Plek van die Horings</i>	Kontekstuele vraag	25	15
10. <i>Vatmaar</i>	Opstelvraag	25	18
11. <i>Vatmaar</i>	Kontekstuele vraag	25	18
12. <i>Onderwêreld</i>	Opstelvraag	25	21
13. <i>Onderwêreld</i>	Kontekstuele vraag	25	21
<b>AFDELING C: DRAMA</b>			
<b>Beantwoord EEN vraag.*</b>			
14. <i>Krismis van Map Jacobs</i>	Opstelvraag	25	24
15. <i>Krismis van Map Jacobs</i>	Kontekstuele vraag	25	24
16. <i>Mis</i>	Opstelvraag	25	28
17. <i>Mis</i>	Kontekstuele vraag	25	28
<b>*LET WEL:</b> Beantwoord EEN OPSTELVRAAG en EEN KONTEKSTUELE VRAAG in AFDELING B en AFDELING C onderskeidelik.			

**KONTROLELYS**

Gebruik die kontrolelys hieronder om te kontroleer of jy die korrekte getal vrae beantwoord het.

<b>AFDELING</b>	<b>VRAAG-NOMMER</b>	<b>GETAL VRAE BEANTWOORD</b>	<b>MERK (✓)</b>
A: Gedigte (Voorgeskrewe gedigte)	1–4	2	
A: Gedigte (Ongesiene gedig)	5	1	
B: Roman (Opstel of kontekstueel)	6–13	1	
C: Drama (Opstel of kontekstueel)	14–17	1	
<b>LET WEL:</b> Beantwoord EEN OPSTELVRAAG en EEN KONTEKSTUELE VRAAG in AFDELING B en AFDELING C onderskeidelik.			

**AFDELING A: GEDIGTE****VOORGESKREWE GEDIGTE**

Beantwoord ENIGE TWEE vrae.

**VRAAG 1: OPSTELVRAAG**

Lees die gedig hieronder en beantwoord dan die vraag wat volg.

**'n brief van hulle vakansie – Breyten Breytenbach**

*vir oubaas:*

- 1        Noudat ek uitgeswel van lyf is kan ek treur
- 2        oor die eelte van my vader, die lugoë van my ma,
- 3        die skamel offerandes van hulle gebede as hulle my
- 4        op die knieë van hul Gij Here God lê;
  
- 5        noudat ek agter 'n baard kou kan ek huil
- 6        as hulle snags my naam fluister met die ruite
- 7        donker knippende oë in die wind, oor die visolie
- 8        vir my griep, die ingelegde perskes (albertas) op die rak
  
- 9        In sy sestigste jaar swem my pa in Stilbaai se see
- 10       en stap myle ver oor die sand met sy reguit bene
- 11       in 'n kortbroek en speel krieket op die duine
- 12       en eet alikruikels in die Sea View-losieshuis
  
- 13       want hys 'n bokser dokter boer
- 14       'n kaptein en 'n held 'n indoena tussen grysaards –
- 15       En as die reën soos 'n gesluerde bruid oor die see kom
- 16       word die lieflinghond (Trixie) lam;
  
- 17       drie dae veg die veearts en buig dan die knie
- 18       en hulle dra die lyk terug na Kafferskuilsrivier
- 19       die plaas van hulle jong liefde en plant die saad
- 20       'n soenoffer in die diep grond se skoot
  
- 21       want nou is hulle minnaars
- 22       stil bome in die najaar met die wind
- 23       strelende drome in die takke
- 24       onder komete leeftye lang wêrelde
  
- 25       My ooms sterf soos kapok in die son
- 26       hartaanval beroerte kanker en tering
- 27       en my pa word stiller en meer verskriklik
- 28       van dop tot dop
  
- 29       Hier waar die harde winters en nat somers
- 30       my lyf ongenaakbaar skil, treur ek oor
- 31       die soet hart van my moeder
- 32       my pa se stil en bitter krag

[Bron: *die ysterkoei moet sweet*, 1964]

Die spreker in die gedig gebruik verskillende vorme van beeldspraak om die verganklikheid/sterflikheid van die mens te verwoord.

Bespreek hierdie stelling in 'n opstel van 250 tot 300 woorde.

**[10]**



**VRAAG 2: KONTEKSTUELE VRAAG**

Lees die gedig hieronder en beantwoord dan die vrae wat volg.

**Reaksie – Vernon February**

1       Ou Ghwarrie en tji sê daai ding  
2       dat tji nou gloe met hart en siel,  
3       is tji oek nou een van hul kring  
4       en vyand vannie hotnotsriel?  
5       oe tji sil nou met newwies  
6       en tjou beste sjute die dag deurbring,  
7       dit kan ek nog verdra,  
8       ma aai, wa'om  
9       daai Sunday-go-to-meeting-face, ou Ghwarrie?  
10      wiet, tji praat mos nes daai seurtjie  
11      oppie draad,  
12      dis justice, love en tjêritie,  
13      tji sê my ek sil eendag brand  
14      ma waa's daai love en tjêritie?  
15      Die teorie wêk olraait,  
16      en wat kry tji ou maat,  
17      net hate en insults hier.  
18      Dan soebat tji nog ek moet gloe  
19      Nei mattie, gee daai kan,  
20      Hou tji tjou Sunday-go-to-meeting-face  
21      en ek my bottel jien.

[Bron: *O snotverdriet*, 1979]

- 2.1       Herlees versreël 1 en 2.
- 2.1.1      Waarop reageer die spreker? (1)
- 2.1.2      Met watter klankeffek/halfrym word "daai ding" gebind? (1)
- 2.1.3      Hoekom is die plasing van "daai ding" aan die einde van die reël effektief? (1)
- 2.2       Wat gebruik die spreker in beide versreël 5 en 8 om die informele gesprekstrant te versterk? (1)
- 2.3       Gee TWEE funksies van die gebruik van die retoriese vrae in dié gedig. (2)
- 2.4       Wat word met "Sunday-go-to-meeting-face" (versreël 9) bedoel? (1)
- 2.5       Dink jy die gebruik van herhaling in versreël 14 en 20 onderskeidelik is funksioneel? Motiveer telkens jou antwoord. (2)
- 2.6       Gee die tema van die gedig. (1)
- [10]**

**VRAAG 3: KONTEKSTUELE VRAAG**

Lees die gedig hieronder en beantwoord dan die vrae wat volg.

**Vincent van Gogh – DJ Opperman**

1 Jy het as 'n miskende  
2 heilige vergeefs geveg teen die ellende  
3 en die onreg in die krotte van die myn,  
4 in agterbuurtes en op landerye; slegs die pyn  
5 en skriklike stryd van God  
6 leer ken, wat mens en boom verknot  
7 in Sy kramptreкке; maar eers toe jy die koringgerwe  
8 in aanbidding van die son kon verwe,  
9 boere, wasvrouens en gepynigde gesigte,  
10 die kantelende landskap in die snelle ligte  
11 geel en groen en blou – alles met koorsige gevele  
12 tot branding van die skone kon verwek,  
13 toe is Sy hartstog eers in jou volbring  
14 soos groen sipresse tot 'n vlam verwring.

[Bron: *Heilige beeste*, 1937]

- 3.1 Watter woord in reël 1 en 2 dui daarop dat Van Gogh geen erkenning gekry het nie? (1)
- 3.2 Herlees versreël 5.
- 3.2.1 Waarna verwys die "skriklike stryd" (versreël 5)? (1)
- 3.2.2 Dink jy die verwysing na die stryd as "skriklike" is 'n funksionele beskrywing? Gee TWEE redes vir jou antwoord. (2)
- 3.3 "maar eers toe jy die koringgerwe in aanbidding van die son kon verwe" (versreël 7 en 8)
- Benoem die beeldspraak wat voorkom én skryf hoe dié beeld in hierdie versreëls beklemtoon word. (2)
- 3.4 Hoe hef die spreker Van Gogh se kleurgebruik in reël 11 uit? (2)
- 3.5 Benoem die eindrym wat in die gedig gebruik word. (1)
- 3.6 Hoe kontrasteer die stemming in versreëls 1 tot 7 met die stemming in versreëls 8 tot 14? (1)
- [10]**

## VRAAG 4: KONTEKSTUELE VRAAG

Lees die gedig hieronder en beantwoord dan die vrae wat volg.

### besoekersboek – Fanie Olivier

- 1 op die sel se mure het iemand uitgekrap
- 2 (of liever: ingekrap): sy naam en al die dae
- 3 van sy duskantste verblyf. gaan mens op stap
- 4 deur duikweë stasies onder brûe bly draai die vrae
- 5 wie was dié peter? waar kom pam vandaan?
- 6 hoe het die vriendskap tussen brian en ed begin?
- 7 sou w.a.l. se ouers hom meer as normaal geslaan
- 8 het? hoe lank het lieb sy liesbet bly bemin?
- 9 ek loer na hiërogliewe. 'n boer het my gewys
- 10 waar jagtonele oorgebly het teen die krans.
- 11 vóór in die gideons se bybel is 'n lang lys
- 12 lesers wat hul teen sterflikheid probeer verskans.
- 13 'n kind hoes seer; 'n lam huil stomgemaak. ek skraap
- 14 moed bymekaar: ek was hier en hier het ek geslaap.

[Bron: Skimmellig, 1978]

- 4.1 Watter woord in versreël 2 sluit by die letterlike betekenis van die titel aan? (1)
- 4.2 Wat is die funksie van die kleinletters in onderskeidelik die titel én die eiename in versreëls 5 tot 8? (2)
- 4.3 Wat gebruik die spreker in versreël 7 en 8 om die kortstondigheid van verhoudings uit te lig? (1)
- 4.4 Herlees versreël 9.
  - 4.4.1 Is daar 'n verband tussen versreël 9 en die eerste drie woorde in versreël 2? Motiveer jou antwoord. (1)
  - 4.4.2 Op watter TWEE maniere word dié eerste drie woorde (in versreël 2) uitgehef? (2)
- 4.5 Slaag die mens daarin om onsterflikheid te verkry? Motiveer jou antwoord na aanleiding van versreël 12. (1)
- 4.6 Herlees versreël 13 en 14.

Wat suggereer die spreker in versreël 13 én hoe sluit dit by die spreker se optrede in versreël 14 aan? (2)

[10]

**ONGESIENE GEDIG (VERPLIGTEND)****VRAAG 5: KONTEKSTUELE VRAAG**

Lees die gedig hieronder en beantwoord dan die vrae wat volg.

**selfs die son – Pieter Smit**

- 1 jy praat van trek na griekeland
- 2 maar my oë
- 3 sien reeds hoe eensaam
- 4 staan die suikerbos
- 5 teen die berg se suidekant
- 6 o hierdie land sal ons swaar verlaat
- 7 elke oggend
- 8 strek net 'n dagreis voor ons uit
- 9 al droog die dae
- 10 net perskes by bethulie
- 11 weg van mense in die son
- 12 hierdie land gaan ons swaar verlaat
- 13 hierdie land wat konsertina\* speel
- 14 met eensaamheid
- 15 hierdie land wat wals met hartseer
- 16 as jou voete nie vat aan sy grond nie
- 17 hierdie land sal ons swaar verlaat
- 18 ja selfs die son keer terug
- 19 en hierdie grond weet reeds
- 20 hoe klop die tuisblykierie op sy rug

*\*Konsertina is 'n musiekinstrument soos 'n klein trekklavier wat jy in albei hande vashou en bespeel deur knoppies langs die kante te druk terwyl jy jou hande na en weg van mekaar beweeg.*

[Bron: Witskrif, 1987]

- 5.1 Na wie verwys die spreker met die woord "jy" in versreël 1? (1)
- 5.2 Met watter woord in versreëls 1 tot 5 dui die spreker 'n teenstelling aan? (1)
- 5.3 Benoem die retoriese middel wat in versreël 12 gebruik word en gee 'n rede vir die gebruik daarvan. (2)
- 5.4 Wat is die funksie van die inkeping van versreël 14? (1)
- 5.5 Watter stemming heers in versreëls 1 tot 6? Haal 'n woord uit versreëls 16 tot 17 aan wat by hierdie stemming aansluit. (2)
- 5.6 Herlees versreëls 18 tot 20.
  - 5.6.1 Benoem die driereëlige strofe. (1)
  - 5.6.2 Dink jy die indeling van dié drie versreëls in 'n afsonderlike strofe is funksioneel? Motiveer jou antwoord met TWEE redes. (2)

**[10]**

**TOTAAL AFDELING A: 30**

## AFDELING B: ROMAN

Beantwoord in hierdie afdeling SLEGS EEN vraag oor die roman wat jy bestudeer het.

### **DIE KWART-VOOR-SEWE-LELIE – Eleanor Baker**

Beantwoord ÓF VRAAG 6 (opstelvraag) ÓF VRAAG 7 (kontekstuele vraag).

### **VRAAG 6: DIE KWART-VOOR-SEWE-LELIE – OPSTELVRAAG**

Anders as ander mense gebruik Iris haar fantasiekarakters en die teenwoordigheid van die Engel in haar lewe om haar werklikheid beter te maak.

Bespreek hierdie stelling in 'n opstel van 400 tot 450 woorde.

[25]

### **VRAAG 7: DIE KWART-VOOR-SEWE-LELIE – KONTEKSTUELE VRAAG**

Lees die uittreksels hieronder aandagtig deur en beantwoord die vrae wat volg.

#### **TEKS A**

"Het jy nie iets beters om te doen nie?" het ek gevra toe hy my uiteindelik deur die groot glasdeure van 'n winkel stoot.

"Nee."

In die skoenafdeling het ek my klam hare agtertoe geskud en gesien hoe die kamera flits. Ek het dit geïgnoreer en toegelaat dat die assistent tongklikkend my blou voete meet. 'n Seëning was dit, 'n warm omhelsing toe my voete gehul is in wolsokke en stewels met trekkerbandssole.

5

"Aa," het ek gesug en die helfte van my Kersfeesbonus aan die winkeldame betaal.

"Dis so," het die Engel agter my beaam, maar ek het my nie aan hom gesteur nie omdat hy natuurlik nie regtig bestaan nie en bloot so opdringerig geword het omdat hy Peter se telefoongesprek afgeluister het.

10

"Waarheen nou?" het Joe gevra en self geantwoord. "Wat van die park? Ek kan mooi foto's van jou neem."

"Verskoon my," het ek beleef geantwoord. "Maar wat is hierdie beheptheid met foto's neem? Nie eens as baba is ek so gedurig afgeneem nie. 'n Derde kind se oulikhede is ou nuus en ..."

15

"Jy't 'n interessante gesig. Ons kan iets daarvan maak."

Ek het 'n paar potensiële leuens agtermekaar gekry. Sou ek noem dat my ma by die hotel vir my wag? "My agent sal nie hiervan hou nie," het ek die swakste moontlike verskoning opgediep.

20

"Agent? Ek het nie geweet jy het een nie." Hy het die lensdop van die kamera teruggedruk. "Wie is hy? Ons kan 'n ooreenkoms aangaan."

7.1 Gee TWEE redes waarom Iris verplig is om Joe saam met haar na die afdelingswinkel te neem.

(2)

7.2 By watter vorige geleentheid wou iemand ook 'n foto (soos in reël 12 en 13) van Iris neem?

(1)

- 7.3 Herlees reël 12 en 13.
- 7.3.1 Watter verband is daar tussen die moontlikheid van 'n modelkontrak (as gevolg van die foto's wat Joe neem) en Iris se obsessie? (1)
- 7.3.2 Noem TWEE voorbeelde van innerlike konflik wat die moontlike modelkontrak by Iris veroorsaak. (2)
- 7.4 Hoekom kies Joe juis Central Park om foto's van Iris te neem? (1)
- 7.5 Het dit 'n invloed op Iris dat sy die derde kind is? Motiveer jou antwoord met DRIE redes. (3)
- 7.6 Herlees reël 17.
- Watter persoon het vroeër in die roman soortgelyke woorde aan Iris gesê en watter beskrywing gee Iris by daardie geleentheid van haar gesig? (2)
- 7.7 Waarom dink Iris die leuens in reëls 18 tot 20 uit en wat gee aanleiding daartoe dat sy tog saam met Joe gaan om foto's te neem? (2)
- 7.8 Dink jy Peter se optrede nadat Joe die modelkontrak vir Iris aangebied het, is geregverdig? Motiveer jou antwoord. (1)

## EN

### TEKS B

"Ek weet nie."	
"Jy's nie lief vir Frederik nie."	
Ek het gesug. "Ek weet. Dis oor Peter wat ek wonder. Ken ek hom goed genoeg om tot 'n besluit te kom?"	
"Het hy jou gevra?" het hy my vraag slim teruggekaats.	5
"Soort van. As ek nou 'n karakter in een van my stories was, het ek iets dramaties gedoen soos sy kind verwag. Dit sou alles tot 'n punt dryf."	
"Jy's op die Pil," het hy my herinner.	
"En jy's 'n vreeslik byderwetse engel," het ek gesê. "Het jy ook só met Ouma gepraat?"	10
"Tye was anders."	
"Volgens haar het jy haar aangeraai om haar onheiligheid met Oupa te staak." Ek het gelag. "Waar kom jy aan so 'n eufemisme?"	
Hy het sy waardigheid behou. "Mense skryf maklik dinge aan my toe wat hulle eintlik self besluit het."	15
"Nog 'n ding," het ek onthou. "Waarom het jy jou by my aangesluit? Wat van Ma of die ander tantes of Elsa en Kara? Wat het ek en Ouma gemeen?"	
"Jy het my opgeroep," het hy gesê. "Jy het my een van jou fantasieë gemaak."	
Ek het regop gesit en hom goed bekijk. "Jy's alles behalwe 'n fantasie. Ek sien jou met my eie oë. Jou linkervlerk se punt het 'n modderspatsel op."	20
Hy het sy vlerk gelig, daarna gekyk en dit teen die wit beddeken van die bed afgestof.	
"Terwyl ons nou die hele nag het om te praat, is daar baie wat ek jou wil vra," het ek hom gesê.	

- 7.9 Behalwe dat Peter op Frederik jaloers is, kom sy besitlikheid by TWEE ander geleenthede na vore. Noem die geleenthede. (2)
- 7.10 Die Engel is 'n werklikheid in Iris se lewe.
- 7.10.1 Watter TWEE rolle speel die Engel in Iris se lewe? (2)
- 7.10.2 Hoe en waarom verander die Engel se rol aan die einde van die roman? (2)
- 7.11 Ondergaan Iris karakterontwikkeling in die loop van die roman? Gee 'n rede vir jou antwoord. (1)
- 7.12 Herlees TEKS A reël 9 tot 11 en TEKS B reël 18 tot 20.
- 7.12.1 Motiveer waarom Iris die Engel in TEKS A (reël 9 tot 11) en TEKS B (reël 18 tot 20) onderskeidelik verskillend beleef. (2)
- 7.12.2 Hoe reageer Peter op Iris se verhouding met die Engel? (1)
- [25]**

**MANAKA PLEK VAN DIE HORINGS – Pieter Pieterse**

Beantwoord ÓF VRAAG 8 (opstelvraag) ÓF VRAAG 9 (kontekstuele vraag).

**VRAAG 8: MANAKA PLEK VAN DIE HORINGS – OPSTELVRAAG**

In die roman is Baas 'n andersoortige mens wat sy eie kop volg. Wat maak hom so anders?

Beantwoord die vraag in 'n opstel van 400 tot 450 woorde.

**[25]****VRAAG 9: MANAKA PLEK VAN DIE HORINGS – KONTEKSTUELE VRAAG**

Lees die uittreksels hieronder aandagtig deur en beantwoord die vrae wat volg.

**TEKS C**

... Hulle word in die familiekerkhof in die Republiek begrawe.

Met die verkryging van onafhanklikheid is die stryd vir Baas nog nie verby nie. Hy word as 'n uitlander beskou en beland in 'n jare lange politieke oorlog om iets van sy erfposisie te probeer behou. Uit desperaatheid word hy jagter. Maande lank jag hy meedoënloos sy eie beeste in die mopanieveld van Sable Ranch, selfs in die rantveld op die oosgrens van die plaas. Die kudde Brahmane het gedurende die oorlog so wild soos koedoes geword.

Hy en die Ierse terriër wat hy by 'n teler in Mutare gekoop het, gebruik sy oorlede pa se kliniek as slaapplek. Sable Ranch se opstal is afgebrand.

Die reuntjie pas goed aan, al is hy nog jonk. Hy leer gou sy baas se roetine aan. As die mes saans geslyp word vir die volgende dag se jag, weet hy dis amper tyd om kos te kry en sy bek begin kwyl. As die waterbottel vol getap word, weet hy sy bak gaan ook vol gemaak word. En wanneer die Bybel laataand uit die jagbagasie gehaal word, weet hy dis amper slaaptyd en hy krul hom op sy streepsak langs die kampbed op. Maar sy oë bly oop. Eers as die Bybel weer gebêre word, maak hy hulle met 'n tevrede sug toe en slaan vir oulaas met sy driekwartstert 'n paar sambokslae op die vloer om te wys hy hou van alles wat nou gebeur.

Die gedeelte wat Baas in hierdie tyd dikwels hardop uit sy oupagrootjie se verweerde Bybeltjie met die bruin leeromslag lees ...

- 9.1 Wie is die eerste familielid wat in die familiekerkhof (reël 1) begrawe is? (1)
- 9.2 Herlees die onderstreepte sinsdeel in reël 2 en 3.
  - 9.2.1 Hoekom word Baas op Manaka anders as in Suid-Rhodesië behandel? (1)
  - 9.2.2 Op watter TWEE maniere word Baas op Manaka deur die khuta uitgebuit? (2)
- 9.3 Baas se ouers sterf in Suid-Rhodesië.
  - 9.3.1 Het die dood van Baas se ouers 'n permanente invloed op sy geloofslewe? Motiveer jou antwoord. (1)
  - 9.3.2 Watter TWEE mense in die roman praat met Baas oor sy ouers se dood? (2)



9.4 Baas verloor uiteindelik al sy geld op Manaka.

Watter karaktereienskap van Baas, dink jy, is hoofsaaklik hiervoor verantwoordelik? Motiveer jou antwoord met TWEE feite. (3)

9.5 Is dit van belang dat die verteller in soveel besonderhede uitbrei op die jong reuntjie in reëls 10 tot 17? Gee TWEE redes vir jou antwoord. (2)

## EN

### TEKS D

Baas loop teen die ruie duin af rivier se kant toe.

"Die pad gaan onder die groot maroela verby!" hoor hy Grace roep.

Teen die luglyn sien hy die boom se kaal takke in die laaste lig van die maan. Hy kry die voetpad wat Manaka toe gaan.

Die janfrederik sing reeds toe Baas by die huis kom. Hy klim teen sy boot op en gaan sit tussen die bagasierakke op die bodek met sy rug teen die stuurkajuit en wag dat dit moet lig word. Die seekoeie kom raserig terug van hulle weiplekke af. 5

Sy gedagtes dwaal oor die stil water van die Zambezi ver onder hom. Waar is sy nou? Elke mens wat doodgaan, laat iemand agter wat wonder wat van sy siel geword het ... DV, sê Whitey – as die Here wil. Sodat elkeen wat in Hom glo ... Asseblief ... Ek 10 het nog nooit iemand gesien sterf nie. Tien bokke en 'n kind is die prys van die weddenskap. Daar is 'n vrou met wie ek wil trou, sê die ngambela van die khuta. "Tibelelo" beteken die een wat wag vir haar besoekers. Daar is iemand anders wat vir die Plek van die Horings aansoek gedoen het.

In die oggendskemering draai Baas die plank op sy skoot dat die lig daarop val. 15 Zambezi Grace ... die naam van sy pontboot wat hy tussen Kazangula en Mombova op die stuk kiaat geveer het.

Moenie skuldig voel oor wie jy vernoem nie.

Hy bêre die naamplank weer in die kajuit en klim teen die leer af.

9.6 Wat gee aanleiding tot Baas se optrede in reël 1? (1)

9.7 Herlees reël 2.

Dink jy dit is vir Grace regtig nodig om vir Baas die padaanwysings te gee? Motiveer jou antwoord. (1)

9.8 Waarom gaan sit Baas juis op sy boot om alleen met sy gedagtes te wees? Hoe sluit dit aan by die innerlike konflik wat hy oor sy eie persoonlike ruimte op daardie oomblik ervaar? (2)

9.9 Reël 10 verwys na Whitey.

9.9.1 Watter rol speel Whitey aanvanklik in Baas se lewe? (1)

9.9.2 Noem DRIE optredes van Whitey wat aandui dat Whitey se aanvanklike rol in Baas se lewe verander. (3)

- 9.10      Wie is aan die woord in die onderstreepte sinne in reël 10 en 11? (1)
- 9.11      "Tien bokke en 'n kind is die prys van die weddenskap." (reël 11 en 12)
- Hoe hou hierdie woorde met Baas se oupagrootjie én met Baas  
            onderskeidelik verband? (2)
- 9.12      Herlees TEKS C reël 1 en TEKS D reël 18 en 19.
- 9.12.1      Watter verband bestaan tussen die naam van die boot en Baas se  
                            oorlede ouers? (1)
- 9.12.2      Vind jy dit ironies dat juis Riekert dié woorde in reël 18 (TEKS D)  
                            vir Baas sê? Motiveer jou antwoord. (1)
- [25]**

**VATMAAR – AHM Scholtz**

Beantwoord ÓF VRAAG 10 (opstelvraag) ÓF VRAAG 11 (kontekstuele vraag).

**VRAAG 10: VATMAAR – OPSTELVRAAG**

In die roman is Ta Vuurmaak anders as die ander karakters van Vatmaar. Wat maak hom so anders?

Beantwoord die vraag in 'n opstel van 400 tot 450 woorde.

**[25]****VRAAG 11: VATMAAR – KONTEKSTUELE VRAAG**

Lees die uittreksels hieronder aandagtig deur en beantwoord die vrae wat volg.

**TEKS E**

... en gaan staan by die koppenent van die kis. Hy het in die swart gesig van sy geliefde Ruth gekyk en in 'n mooi, ryk stem gesing: Rock of Ages, cleft for me, Let me hide myself in Thee ... Al vier verse.

Die kis is toegemaak en op Oom Flip se trollie getel en Ou Swaai het geweet sy moet nie haastig wees nie, die hele Vatmaar loop agter haar aan.

5

Langs die graf het Oom Chai met 'n gebroke stem Nader my God by U begin sing. Vatmaar het die woorde geken en dit gesing asof dit uit een hart kom en asof hulle met die Hemelse Vader van Vatmaar praat. Daarna is die kis laat sak. Oom Chai het 'n paar handevol sand in die graf gegooi en in Engels gesê: Dust tot dust, ashes tot ashes – uit respek vir sy vriend se taal.

10

Terwyl die graf toegegooi word, het Oom Chai na Oupa Lewies se gesig gekyk, sy hand gevat en hom weggelei. Hulle het mekaar omhels soos net tweeling kan. Albei het begin huil. Die trane het op die skouers van die twee grysaards gedrup terwyl hulle so staan. Almal het stil geraak. Toe het die twee ou vriende hulle arms laat sak en sonder om na te dink het elkeen sy kakiesakdoek uitgehaal en die ander se gesig afgedroog. Die mense het dit alles doodstil staan en aankyk. Oom Flip het met 'n stadige skud van sy kop gesê: Die liefde ken nie grense nie.

15

- 11.1 Hoekom was die verhouding tussen Oupa Lewies en Ruth (reël 1 en 2) vir daardie tyd buitengewoon? (1)
- 11.2 Hoekom is Oupa Lewies en Ruth uiteindelik op Vatmaar gelukkig? (1)
- 11.3 Noem TWEE voordele wat sy verhouding met Oupa Lewies vir Oom Chai (reël 6) ná die Tweede Vryheidsoorlog ingehou het. (2)
- 11.4 Oom Chai en Oupa Lewies ken mekaar van voor Vatmaar se ontstaan.
  - 11.4.1 Hoe dra Oupa Lewies tot Vatmaar se ontstaan by? (1)
  - 11.4.2 Watter rol speel Oom Chai in die totstandkoming van Vatmaar as nedersetting? (1)

- 11.5 Oom Chai sing volgens reël 6 in Afrikaans.  
Noem TWEE voorbeelde van Oom Chai se betrokkenheid om die Vatmaarkinders in Afrikaans op te voed. (2)
- 11.6 Oom Chai beleef konflik in Vatmaar.  
11.6.1 Watter besluit van Oom Chai veroorsaak dat hy die respek van die Vatmaar-inwoners verloor? (1)  
11.6.2 Noem TWEE voorbeelde van innerlike konflik wat Oom Chai ervaar as gevolg van dié besluit? (2)
- 11.7 Die twee mans se wedersydse omgee in reëls 12 tot 14 is 'n bewys van die gesindheid wat op Vatmaar heers.  
11.7.1 Noem TWEE voorbeelde van ander Vatmaar-inwoners se positiewe optrede teenoor mekaar. (2)  
11.7.2 Word Settie September se dade teenoor Tant Wonnie deur omgee gekenmerk? Gee DRIE redes vir jou antwoord. (3)

**EN****TEKS F**

Miesies Wingrove moet my verskoon, sê Tant Wonnie. Ek het op pad van die Pan af gedink dit sal nou ordentlik wees om huur te betaal vir die dak oor my kop. Die dak behoort aan julle en ek sê dankie met 'n ope hart.

Toe haal sy 'n kers uit en steek dit aan en vat die lantern, lig die glas op en blaas die lig uit en gee dit vir Missus Wingrove: Asseblief, aanvaar dit as my dank. 5

Dit was of die twee vroue se harte een was want hulle gevoelens was dieselfde. Ek sê ook baie dankie, het Missus Wingrove gesê.

In haar enigheid het Suzan gedink: Die Here is goed, maar nou gee my Ma-Ma dan weg wat Hy vir ons gegee het!

Suzan, sê Missus Wingrove, steek asseblief vir jou Antie die lamp op. Toe Suzan vir haar die brandende lantern aangee, sê sy: Dankie. Vat dit vir jou my kind, ook met 'n ope hart. 10

Dankie, Antie Wingrove, het Suzan gesê en die lantern teruggehaak aan die draad waar dit gehang het. Toe het sy die kers met haar vingers uitgesnuit. Want die mense het gesê om 'n kers met jou mond uit te blaas, is om die lig uit die huis uit te blaas. 15

Sy het die vrou omhels en haar van haar stoel af opgelig en gesoen want sy was baie klein.

Jy druk my wind uit, het Missus Wingrove laggend gesê.

Baie dankie, Antie, het Suzan weer gesê. Ek sal mooi agter dit kyk.

- 11.8 Reël 1 verwys na Tant Wonnie.  
11.8.1 Wat het gebeur wat dit nou vir Tant Wonnie moontlik maak om huur te betaal? (1)  
11.8.2 Op watter TWEE maniere het Settie September se optrede Tant Wonnie bevoordeel? (2)

- 11.9 Watter voorwaarde stel Missus Wingrove vir Tant Wonnie se terugkoop van die huis? (1)
- 11.10 Hoekom is Suzan se dankbaarheid in reëls 15 tot 18 ironies? (1)
- 11.11 Herlees TEKS E reël 15 en 16 asook TEKS F reël 8 en 9.
- 11.11.1 Hoe geld Oom Flip se gedagte dat die liefde nie grense ken nie vir Ma Khumalo en Kenny onderskeidelik? (2)
- 11.11.2 Geld die tema van lyding sonder grense vir Suzan (reël 18) en Harry Look onderskeidelik? Motiveer jou antwoord. (2)
- [25]**

**ONDERWÊRELD – Fanie Viljoen**

Beantwoord ÓF VRAAG 12 (opstelvraag) ÓF VRAAG 13 (kontekstuele vraag).

**VRAAG 12: ONDERWÊRELD – OPSTELVRAAG**

In die roman is Eckardt 'n andersoortige mens. Wat maak hom so anders?

Beantwoord die vraag in 'n opstel van 400 tot 450 woorde.

**[25]****VRAAG 13: ONDERWÊRELD – KONTEKSTUELE VRAAG**

Lees die uittreksels hieronder aandagtig deur en beantwoord die vrae wat volg.

**TEKS G**

Teen die Saterdagoggend het die nuus soos 'n griepiepidemie versprei na die laer grade. Almal probeer inligting uit die matrieks kry, maar omdat dié nie regtig iets sê nie, maak die ouens hulle eie stories op. Ek is aan diens in die Da Vinci-eetsaal. Dwaal net lusteloos daar rond en wens die spul wil nou hul freerange eiers en ander organiese kos eet en loop.

5

"Hulle het hom gekry, ouens. Vir Eckardt." 'n Opgewonde stem agter my. Ek draai vinnig om. "Opgehang aan 'n boom. Sy tong so uit – "

"Ek gryp die graadagt-ou aan die skouer. Hard. "Waar hoor jy dit?"

"By Jones," sê hy, stil geskrik.

"Wie is Jones?"

10

Hy wys met sy vinger. Ek voel hoe woede my lyf oorneem. Dit is so erg dat ek 'n oomblik net eers moet stilstaan en asemhaal. Kalmeer. "Sê vir Jones ek ruk sý tong uit as hy weer sulke bog versprei."

Ek stap buitentoe en gaan sit op die trap voor die koshuis. Eckardt se deur was vanoggend gesluit toe ek daaraan voel. Vir 'n oomblik het dit my laat dink aan 'n grafsteen. Die wit verf soos marmar. Ek weet waar die koshuisvader en terreinbestuurder 'n loper hou vir die kamers, maar ek het nie gebodder om dit te gaan haal nie.

15

Ek kyk uit oor die plein. Tom, die terreinbestuurder, stap verby. Hy en 'n assistent is besig met die laaste voorbereidings vir die rugbywedstryde wat negeuur begin. Toe hy sien ek kyk na hom, lig hy sy hand. Ek knik net my kop.

20

- 13.1 Na watter nuus word in reël 1 verwys? (1)
- 13.2 Is Greg se optrede in die onderstreepte woorde geregverdig? Motiveer jou antwoord met TWEE redes. (2)
- 13.3 Konflik karakteriseer Greg.
- 13.3.1 Watter afleiding oor Greg se karakter kan na aanleiding van sy uiterlike konflik in reëls 11 tot 13 gemaak word? (1)
- 13.3.2 Gee DRIE voorbeelde van innerlike konflik by Greg in die roman. (3)

13.4 Verwys na reël 16 en 17.

Is dit van belang vir die verloop van die verhaal dat Greg oor hierdie inligting beskik? Gee TWEE redes vir jou antwoord. (2)

13.5 Herlees reël 18.

13.5.1 Watter rol speel Tom om Greg in die onderwêreld in te lei? (1)

13.5.2 Op watter TWEE maniere help Tom om Greg te mislei? (2)

13.6 Tot watter insig kom Greg (na aanleiding van reël 20) nadat hy meerderwaardig teenoor Tom opgetree het? (1)

## EN

### TEKS H

Ek kry vir Eckardt op pad na die Engelsklas. "Jy onthou nog van jou belofte van gisteraand, nè!" herinner ek hom.

"Ek het nie vergeet nie," sê hy. Die terreinbestuurder loop verby ons. Hy kyk in ons rigting. Eckardt knik sy kop uit hoflikheid, maar praat nie verder totdat hy buite hoorafstand is nie. "Dink solank aan 'n lekker catchy nick." 5

"'n Watse ding?"

"Jou skuilnaam, Greg," fluister Eckardt uitdagend toe hy opstaan, "Jou hacker nickname ... Jy gaan tog nie onder jou eie naam onderwêreld toe nie."

"Wat is joune?" vra ek toe hy begin loop.

Eckardt draai terug, leun oor na my toe: "My naam is Ekk-0." 10

Die res van die skooldag is 'n total loss vir my. Ek sit net en dink aan 'n hacker-naam.

G-man. Klink soos 'n superhero wat uit die Fantastic 5 geskop is, en toe word hulle die Fantastic 4.

Gregorian. Nee, dit sal klink of ek 'n hacker-monnik is.

Dalk moet ek iets vat wat niks te doen het met my naam nie. Smash. Master. 15  
Destroyer. Ek hou nogal van daardie een en onderstreep hom vet agterin my dagboek.  
Jackal. Intruder. Shadow.

So gaan dit aan en aan. Uiteindelik kom ek op iets af. Force. En toe het ek dit: 'n kombinasie van my voorletter en Force.

G-Force. 20

Ek skryf dit die aand op die notepad wat ek saamgebring het na Eckardt se kamer. "G-Force," sê ek triomfantlik, asof ek die eerste hekkie al oor is.

Eckardt skud sy kop. Hy trek die "For" in die naam dood.

13.7 Hoe verskil Greg se gesindheid teenoor Eckardt in reël 1 en 2 van sy gesindheid teenoor hom tydens hulle eerste ontmoeting? (1)

13.8 Gee TWEE ooreenkomste tussen die skoolruimte en Greg se ouerhuis. (2)

- 13.9 In 'n roman is ondersteuning van die tema belangrik.
- 13.9.1 Hoe oorheers die onderwêreld (reël 8) Greg en sy pa se lewens onderskeidelik? (2)
- 13.9.2 Is plaasvervangerskap op beide Greg en sy pa van toepassing? Motiveer jou antwoord met EEN rede. (1)
- 13.10 Watter verband is daar tussen Ekk-0 se karakter en sy naam? (1)
- 13.11 Greg (reël 20) én sy pa maak van 'n skuilnaam gebruik.
- 13.11.1 Wat suggereer Greg met "G-4ce"? (1)
- 13.11.2 Waarom is dit ironies dat sy pa "The Candlestick-Maker" as skuilnaam gebruik? (1)
- 13.12 Herlees TEKS G reëls 13 tot 16 en TEKS H reëls 21 tot 23.
- 13.12.1 Wat gee aanleiding tot Greg se gemoedstoestand in TEKS G (reëls 13 tot 16) en TEKS H (reëls 21 tot 23) onderskeidelik? (2)
- 13.12.2 Wat is Greg se gemoedstoestand in TEKS H (reëls 21 tot 23)? (1)
- [25]**
- TOTAAL AFDELING B: 25**



**AFDELING C: DRAMA**

Beantwoord in hierdie afdeling SLEGS EEN vraag oor die drama wat jy bestudeer het.

**KRISMIS VAN MAP JACOBS – Adam Small**

Beantwoord ÓF VRAAG 14 (opstelvraag) ÓF VRAAG 15 (kontekstuele vraag).

**VRAAG 14: KRISMIS VAN MAP JACOBS – OPSTELVRAAG**

*La Guma: Best of luck. Maar 'is 'n sterk tronk dié. Kyk die tralies!*

Bespreek in 'n opstel van 400 tot 450 woorde hoe hierdie woorde vir Johnnie/Map en Cavernelis waar word.

**[25]****VRAAG 15: KRISMIS VAN MAP JACOBS – KONTEKSTUELE VRAAG**

Lees die uittreksels hieronder aandagtig deur en beantwoord die vrae wat volg.

**TEKS I**

ALMAL	(groet): Haai, Miriam! ... Miriam ...	
BÊREND:	Ons is 'n bánd, hoor, Miriam, nie 'n choir nie! 'Cause ons ammal sing vals! (Lag)	
MIRIAM:	O ...	
FREDDY:	Miriam, my meisie, ek hoor jy sê O-li-fant ... (Knik Bêrend se kant toe.) Maar dis g'n plain O-li-fant nie, jong, dis Oliphant, op Ingils like ...	5
BÊREND:	Lyster jy nie na hom nie, Miriam! <i>Miriam lag skaam.</i>	
FREDDY:	Speel maar, Bêrend ... Gie weer die noot!	10
MIRIAM:	Oompie Paulsen, Boeta Issie het gesê ek moet die band se measurements kom vat, vir julle suits ...	
OOMPIE PAULSEN:	'Is so ... Jy kan maar aangaan, Miriam ... 'Is al weer dié tyd vannie jaar, ja en hulle ken nog nie eers al die march'e nie! Laat staan nog al die note!	15
DANNY:	Die march'e! Hel, oompie Paulsen, ons is mos nie in die army nie!	
BOYTJIE:	Oompie klink kompleteet of ons freedom fighters is, ek mien terrorists! Die march'e! (Lag)	
OOMPIE PAULSEN:	Nei, maar Miriampie is reg vir die measurements ...	
MIRIAM:	Somaar hierso bytekant?	20
OOMPIE PAULSEN:	'Is so ... Lyster almal, Miriam het gekom, Miriam van Boeta Issie om onse measurements te niem, vir onse klere ...	
MIRIAM:	Ek sil nie te lank wies nie ...	
KAFFI'TJIE:	'Is ôrait, ons het mos tyd, miss ...	
BÊREND:	Samsodien ... Miss Samsodien, man, ken jy dan nie vir Samsodien Tailors nie?	25
KAFFI'TJIE:	O ... Miss Samsodien ...	
OOMPIE PAULSEN:	Kaffi'tjie is nuut by ons, Miriam. (Dan hard en gemoedelik.) Vir enigiemand wat nog nie mag wiet nie, Issie Samsodien, Miriam se pa, is onse tailor ... elke jaar ...	30

DANNY:	Verstaan jy nou, Kaffi'tjie?	
KAFFI'TJIE:	Ek leer gou! <i>Hulle lag.</i>	
OOMPIE PAULSEN:	Kô, hou nou op moet praat. Miriam sal die measurements niem, en while sy die measurments niem, practise ons ma aan ... Miriam, jy sal by Boytjie beginne ...	35

- 15.1 Vir watter geleentheid moet Miriam nuwe klere vir Bêrend-hulle maak? (1)
- 15.2 In reël 13 is Oompie Paulsen aan die woord.
- 15.2.1 Hoe was Johnnie in die verlede by Oompie Paulsen se orkes betrokke? (1)
- 15.2.2 Het dié betrokkenheid 'n voordeel vir Oompie Paulsen se orkes ingehou? Motiveer jou antwoord. (1)
- 15.3 Dink jy Oompie Paulsen en die orkeslede behandel Johnnie regverdig ná sy vrylating? Motiveer jou antwoord met TWEE redes. (2)
- 15.4 Waar in die struktuur (bou) van die drama pas hierdie teks in? Motiveer jou antwoord. (2)
- 15.5 Die teks is 'n uittreksel uit die drama, *Krismis van Map Jacobs*.
- 15.5.1 Hoekom is die titel spesifiek **Krismis** van Map Jacobs? (1)
- 15.5.2 Hoekom is dié *Krismis* vir Cavernelis en Blanchie onderskeidelik ironies? (2)

**EN**

## TEKS J

*Hy is nou die verteller, hulle die voorwerpe van die storie. Dan is Map stil. Die lig helder op hom. Ons sien hom, sy arms rustend op die leuning van die stoel wat hy agterstevoor gestel het om op te sit. Hy staar voor hom uit.*

MAP: Tommy Sobotker! En Cyril, en Richie, en Willy la Guma, en Blanchie ...  
 almal ... almal ... (*Lag, dieselfde lag en staar voor hom uit.*) Almal hier, almal 5  
 in hierdie strate, in hierdie huise, almal ... (*Lag.*) En die employers o, almal  
 die employers ... Hulle almal is so sympathetic ... Blanchie, ja, even  
 Blanchie, almal is so sympathetic ... But ... (*sê dit baie hard*) *but, but, but,*  
*but ... sympathetic, but ... (Stil, lag weer.)* Even Cyril en Richie! ... Apostel 10  
 George, ek wiet jy't my ge-warn lat dit so sal wies, maar ... well ... 'is tough  
 luck, Apostel George ... (*Dan, skielik, skreeu hy.*) *'Is tough luck, Here! (Dan*  
*praat hy, sagter, met Antie Grootmeisie iewers in die huis.) 'Is tough luck,*  
 Ma! Lyster Ma?! (*Hy staan op, en praat asof hy voor 'n spieël staan.*) Here!  
 ... en Ma! ... (*Kyk na die baie tatoeëermerke op sy lyf.*) ... Nei ... (*Lag.*) ...  
 Hulle vat jou nie so nie! Hulle accept jou nie so nie! Map Jacobs, hulle vát jou 15  
 nét nie so nie! 'Cause why? 'Cause hulle kan sien waarvandaan jy kom, jou  
 history is op jou lyf, op jou nek, op jou gesig even ... jou history en even jou  
 geography, jou ... alles! (*Lag weer.*) Hulle vat ga' vir jou so nie! (*Stil, maar*  
*die straat beweeg, en hy wys na almal daar.)* Ma!

- 15.6 Waar was Map voordat hy na hierdie ruimte (TEKS J) gekom het? (1)
- 15.7 Map verwys in reël 4 na Cyril en La Guma.
- 15.7.1 Hoe stem hulle twee se protes teen die omstandighede in die township ooreen? (1)
- 15.7.2 Gee 'n bewys dat Cyril se optrede bydra tot uiterlike konflik in die township. (1)
- 15.8 Wat suggereer Map met die herhaling van "almal is so sympathetic" (reël 7 en 8)? (1)
- 15.9 Dra Apostel George (reël 9 en 10) tot Map se karakterontwikkeling by? Gee 'n rede vir jou antwoord. (1)
- 15.10 Herlees die onderstreepte woorde in reël 11.
- Is dié woorde van Johnnie/Map in ooreenstemming met sy karakter? Motiveer jou antwoord en gee nog TWEE voorbeelde uit die drama wat jou antwoord ondersteun. (3)
- 15.11 Herlees reël 14.
- 15.11.1 Om watter TWEE redes het Map tatoeëermerke op sy lyf? (2)
- 15.11.2 Op watter TWEE maniere ondersteun hierdie tatoeëermerke die tema van vasgevangenskap in die drama? (2)

15.12 Herlees TEKS I reëls 3 tot 8 en TEKS J reëls 9 tot 14.

15.12.1 Gee die stemming in TEKS I (reëls 3 tot 8) en TEKS J (reëls 9 tot 14) onderskeidelik. (2)

15.12.2 Noem EEN insident wat tot die stemming in TEKS J bydra. (1)  
**[25]**

**MIS – Reza de Wet**

Beantwoord ÓF VRAAG 14 (opstelvraag) ÓF VRAAG 15 (kontekstuele vraag).

**VRAAG 16: MIS – OPSTELVRAAG**

*MIEM: Slotte en grendels. Luike toegespyker.*

Bespreek in 'n opstel van 400 tot 450 woorde hoe hierdie woorde in Miem en Meisie se lewens waar is.

**[25]****VRAAG 17: MIS – KONTEKSTUELE VRAAG**

Lees die uittreksels hieronder aandagtig deur en beantwoord dan die vrae wat volg.

**TEKS K**

MIEM:	Is dit jy, Gertie?	
GERTIE:	Ja, Miem!	
MIEM:	Wag net 'n oomblik. <i>(Buk af en loer deur die sleutelgat. Sluit dan die deur oop. Die sirkusmusiek kan gehoor word)</i>	
	<i>GERTIE strompel in deur die gaasdeur. Dit kraak en klap agter haar toe. Sy lyk bedremmeld. Sy het 'n wollerige, groen jas aan en 'n hoed wat skeef oor een oog hang. Sy dra 'n klein leertassie.</i>	5
GERTIE:	Ag, dankie tog. <i>(Haar asem jaag)</i> Ek is byna dood van die ontsteltenis.	
MIEM:	Ag, sies tog, Gertie, wat is dit dan? <i>(Hard aan MEISIE)</i> Maak toe die deur en sluit dit! <u>Die aaklige musiek maak my skoon naar.</u>	10
	<i>(MEISIE maak die deur vinnig toe. Die sirkusmusiek word nie meer gehoor nie)</i>	
MIEM:	<i>(snork. Kopbeweging na die deur)</i> Klinkende simbale! <i>(Simpatiek aan GERTIE)</i> Foei tog, jy lyk soos 'n verkleumde kuiken.	
GERTIE:	Ja, die windjie is geniepsig. <i>(Haal haar hoed af en sit dit op die tafel neer)</i>	15
MIEM:	Gaan word eers warm by die stoof.	
GERTIE:	'n Warm stoof is ongesond. Ek weet hoe om warm te bly. <i>(Begin baie vinnig op een plek trippel terwyl sy haar arms heen en weer swaai)</i>	
MIEM:	Ag, nee wat, Gertie! Daar is 'n tyd en plek vir als!	
	<i>GERTIE lyk afgehaal en gaan sit by die tafel.</i>	20
MIEM:	Daar's vrugtebome wat al bot. Ja, die koue vang hulle seker sleg.	
GERTIE:	Naand, Meisie.	
MEISIE:	Naand, juffrou Gertie.	
MIEM:	Maar sê nou, Gertie. Wat maak jy dié tyd van die aand hier?	

17.1 Watter handeling van Gertie wat die gebeure in die neweteks in reëls 5 tot 7 voorafgaan, bevestig haar vrees?

**(1)**

- 17.2 Herlees die onderstreepte woorde in reël 10.
- 17.2.1 Hoe word Miem deur dié onderstreepte woorde gekarakteriseer? (1)
- 17.2.2 Dink jy Miem slaag daarin om haar siening oor die sirkus op Gertie, Meisie en Konstabel af te dwing? Motiveer jou antwoord deur na elkeen van die karakters afsonderlik te verwys. (3)
- 17.3 Wat impliseer Miem as sy in reël 13 na die sirkusmusiek as "klinkende simbale" verwys? (1)
- 17.4 Herlees die newetekste in reël 17 en 18.
- 17.4.1 Stem dié optrede van Gertie ooreen met hoe sy haar aan Konstabel bekendstel? Motiveer jou antwoord. (1)
- 17.4.2 By watter geleentheid, later in die drama, buit Konstabel hierdie beweeglikheid van Gertie uit? (1)
- 17.5 Die gebeure in die drama speel op die vooraand van die lente af.
- 17.5.1 Gee die volledige datum van die dag waarop dié gebeure afspeel. (1)
- 17.5.2 Hoe sluit hierdie seisoen by Meisie se karakterontwikkeling in die afloop van die drama aan? (1)

## EN

### TEKS L

MEISIE: Oom vet Soon kom voel en almal lag want hy sny sy vinger. Die man wys na 'n lang kis en klap dan die deksel oop. Die mooi meisie soebat en smeek, sy val op haar knieë voor die man. Hy gryp haar polse en sleep haar na die kis. Hy gooi haar in en maak die deksel toe. Haar kop steek diékant uit en haar voete daaikant. Sy lyk baie bang. Die man begin saag en saag en saag. Die meisie skree. Die saag is vol bloed en die kis is middeldeer maar haar kop roer nog én haar voete. Die man gooi sy mantel oor die kis en sê toorwoorde. Hy haal sy mantel af en maak die deksel oop. *(Oorstelp van vreugde)* Die meisie spring uit en alles is reg, sy's weer heel! Die mense skree en fluit. Sy sprei haar arms oop. *(Lig haar arms op en glimlag)* Die man maak 'n kou oop en voëls vlieg uit. Alle soorte met baie kleure. Hulle hang in die lug bokant haar. *(Lyk skielik droewig. Laat haar arms stadig sak. Die geluid van die wind hou op)* Toe voel ek 'n hand op my skouer. Dit was my ma. Sy het haar japon gedra en haar hare was nog ingedraai. Sy't die tuinhokkie gehoor toe ek uitgaan en gaan kyk of alles reg is. My ma het my goed grootgemaak. En elke jaar het sy my streng belet om sirkus toe te gaan. Ek was ongehoorsaam.

- 17.6 Konstabel manipuleer Meisie om hom van bogenoemde besoek aan die sirkus te vertel.  
Gee DRIE voorbeelde van wat hy vir haar sê om haar te oortuig. (3)
- 17.7 Herlees die onderstreepte reëls.
- 17.7.1 Watter ooreenkoms is daar tussen die meisie in dié reëls en Meisie? (1)
- 17.7.2 Noem TWEE kontrasterende optredes tussen hulle. (2)
- 17.8 Verwys na reëls 1 tot 10 waar Meisie aan die woord is.
- 17.8.1 Hoe sluit Meisie se vertelling in reëls 1 tot 10 by die tema van bevryding in die drama aan? (1)
- 17.8.2 Gee TWEE voorbeelde waar Gertie se optrede by dié tema aansluit. (2)
- 17.9 Watter gevolg hou Meisie se ongehoorsaamheid (reëls 13 tot 17) vir Miem in en hoe gebruik Miem hierdie insident later tot haar eie voordeel? (2)
- 17.10 Dink jy hierdie terugflits is belangrik vir die struktuur/bou van die drama? Motiveer jou antwoord. (1)
- 17.11 Meisie bieg hier teenoor Konstabel oor haar ongehoorsaamheid. Waaroor bieg Miem by Konstabel? (1)
- 17.12 Herlees TEKS K reëls 3 tot 12 en TEKS L reëls 7 tot 12.  
Die kombuis in TEKS K (reëls 3 tot 12) en die sirkus in TEKS L (reëls 7 tot 12) dra tot 'n bepaalde stemming by. Noem die stemming wat onderskeidelik in die tekste voorkom. (2)
- [25]

**TOTAAL AFDELING C: 25**  
**GROOTTOTAAL: 80**